

四庫全書

集部

欽定四庫全書

集部

稿文堂集卷

一至三

詳校官庶吉士臣陳若霖

侍讀臣孫球覆勘

謄錄監生臣董誠

謄錄監生臣王人作

謄錄監生臣秦澧

欽定四庫全書

集部三

摘文堂集十五卷

別集類二宋

提要

臣等謹案摘文堂集十五卷宋慕容彥
逢撰彥逢字叔遇宜興人元祐三年進
士調銅陵主簿復中詞科遷淮南節度判官崇
寧元年除祕書省校書郎歷官刑部尚書卒
謚文友宋史不為立傳其生平行履僅見永樂

大典所載墓誌中誌稱所著文集二十卷外制二十卷內制十卷奏議五卷講解五卷藏於家合計之當為六十卷而宋史藝文志載有慕容彥逢集三十卷其目與誌頗不合今據彥逢孫綸原序稱因兵火散失綸搜訪所得分為三十卷命工鏤板日以摛文堂集則是集乃綸所重編宋史據以著錄故與墓誌互異也彥逢才藻富贍當紹聖初設宏詞科

實首中其選後受知徽宗列禁近官侍從者
十有五年一時典冊多出其手今集中存者
尚幾數百篇其榮遇不為不至而檢核所作
希睹謹言惟多以獻媚貢諛熒惑主聽如以
刑部獄空及天下奏案斷絕具劄稱賀至三
四上殊可嗤鄙又如理會居養院學校諸劄
子亦皆希廟堂意旨所尚曲加文飾呂祖謙
輯宋文鑑不錄彥逢一篇其擯斥之意當由

於此特因其沒於政和七年時事尚未潰裂故不至附會童蔡以成其惡名耳然其文章雅麗制詞典重溫厚尤為得體詞采殊有可觀就文論文固亦未可竟廢也謹據永樂大典所載分類哀輯釐為詩二卷雜文十三卷而以謚議墓誌別為一卷附之庶讀者尤得以考見崖畧焉乾隆四十六年九月恭校上

總纂官

臣紀昀

臣陸錫熊

臣孫士毅

毅

總校官臣陸費墀

原序

古今以文名家者多矣其有兼作者之妙為百代之師者文忠蘇公而已是以皇上萬幾之暇親御翰墨為之序贊有曰他人之文或得或失多所取舍至於軾所著讀之終日亶亶忘倦常置左右以為矜式大哉王言誠萬世不刊之典也當時學士大夫有經品題皆足以垂世况深蒙見知者乎尚書文友公家世伊洛河南王之遠裔也天姿秀拔自幼篤學之老不倦家藏書數萬卷

手親是正不憚寒暑蓄諸中者既豐故發諸外者汪洋
大肆浩浩乎莫之禦也元祐間弱冠登進士第至紹聖
初屬設詞科一試而首中之雅為蘇公所器重誠以道
德文章有默契於言意之表宜乎聲相應氣相求也公
司鳳閣直鑿坡登八座五知貢舉天下服其文鑑之高
名公鉅卿多出其門揚歷華途垂三十載惜乎位不滿
德未足究其所學而恭和御製敷演辭命忠言讜論高文
大冊每篇奏御必蒙褒嘉真足以造作者之淵源垂將

來之軌範也平生所著百有餘卷因兵火盜賊之後散
失幾盡慕容太守為公嫡孫力於親舊間搜訪所藏尚
及千篇惠其先後躋駁且命興祖訂正之興祖善太守
之志能使乃祖鴻筆麗藻光傳後世孝也天下學者有
所師法仁也仁且孝君子之能事畢矣奚敢以不敏辭
若乃孝友之行忠誼之節謀猷之嘉德量之廣操履之
正建明之公有朝廷謚議與夫行狀誌銘在開卷昭然
固無待僕措辭而後見也輒因其文而次第之以為不

朽之傳公諱彥逢字叔遇文友其謚云淳熙十有四年
歲次丁未正月上日從政郎象州州學教授劉興祖謹
序

先大父少師文友公弱冠登元祐進士第逮紹聖初首
中詞科之選自會稽教官被召際遇明主徧歷臺省進
登八座平居暇日未嘗釋卷有文集二十卷內制十卷
外制二十卷講解五卷奏議五卷因兵火盜賊之後散
失幾盡論近於親舊間搜訪所得尚及千篇分為三十

卷命工鏤板目以文友公摘文堂集時淳熙十四年歲
次丁未下元日第四孫朝奉郎權知象州軍州兼管內
勸農事借紫綸謹書

全
方
已
方
心
三
言

原
序

--	--	--	--	--	--	--	--	--

欽定四庫全書

稿文集卷一

宋

慕容彥逢

撰

賦

瓦瑞賦

祝令之治金華家問以瑞告曰茲十有二月
癸酉立春欄瓦有花色雜青紫拂之可去留
之不瘁文彩鮮榮兩兩夾峙瓦首鱗次花舉
相似謂予不信并以瓦寄予佐金華獲觀焉

曰嘻靈物効祥胡可勝記彼陶而花未覩茲
美夫豈無因而至耶祝令請賦之予曰唯唯

協洽之歲辛月季冬十有九日春令已融日維癸酉東
風解凍蟄蟲始振草木萌動旦興覩異惋愕未詳非刻
非畫雜以青黃托高薨以耀藻濡湛露之清光靡纖祇
以自固舍翠縹而外揚質糝糝兮可拂色葱蒨而焯煌
狀卿雲之敷葉始膚寸而未將于是晨輝俯映宿靄盡
滌秘艷發散奪人目力非卉木之常姿集孔翠之文翼

蹇將蔓而莫承紛既絕而未極疑飄飄以騰上不終悴
於埏埴是日也閭巷驟傳觀者如堵詢於黃髮于時語
語曰惟祝氏舊有令人詒厥隱德庇貺子孫惟子惟孫
前人是似儒行聿修世有清議惟茲降祥神實司之我
儀圖之歌以叙之乃歌曰江山之陽有祝氏奕世清芬
靄蘭蕙神之聽之錫器瑞所居有光霄燭地旦出土牛
知改歲瓦上雙花應春至神巧無宗奪人偽瓦衆花繁
舉相類毫素模傳示來裔積善之家蓋如是

巖竹賦

元祐六年某道
中有感而作

予佐金華言從吏役方暑溼隆仰畏炎日載馳載驅道
阻且修我僕痛矣憇於道周念茲迅翮向夕知還予行
未息揮汗于顏情悁悁以遐想思鬱鬱而永嘆欲吐辭
兮躡嚅步芳芷兮躡跚久乃指並巖之竹曰始予之間
居愛竹成癖挹之而後飲翫之而後食或攀枝而歌或
就蔭而息或密之以來風聲或踈之以招月色與竹為
友時予三益如接晤言具肆莫逆惟今予懷與昔迥殊

為斗粟以罄折曾匏瓜之不如從甲喧之末務殆心勤
而形癯悵願言之契濶詠瞻彼以躊躇是竹也滴露如
泣倚風如愧如怨如慕姿態特異雖不能言請對以意
曰植物之生春榮秋悴歲寒後凋子實同類稟虛中以
襲道擢圓質以象智筠外飾兮中禮節孤聳兮近義以
比君子考德云備昔子之子悅也謂不可以日無此君
今不予顧也猶友生之離羣學雖不以干祿仕有時乎
為貧知達人之吏隱志奚往而不申夫山林不必靜江

海不必閔勿撓勿櫻湛然乎有為之間乘田委吏擊柝
抱關所遇皆適亦何有乎夏惠若是則與子相忘不必
形遇未始有物孰好孰惡語意已畢子亦驚悟登車詠
歌風清月素

雙楠軒賦

南郭夫子養素丘園于室之右面楠為軒客謂夫子曰
子昔放浪迹如漂萍南遊北涉舟車靡停睠彼通邑豪
俊誇矜崇飾土木以麗爭聲青樓朱閣邃室危亭月臺

峴麓風軒霧薨列嘉植以助蔭裒名葩而播馨聆珍禽
之巧啄玩恠石之殊形洽比婚友意氣相傾飲何拘於
卜晝醉夜色之澄明今夫子之軒廣不數椽攬幽僻以
自誑甘寂寞以窮年豈願言而弗獲將懷土而樂旃夫
子拊髀而歎斂衽而對曰子樂在內子觀在外思莊生
之貴真與老氏之去泰審子心之所安雖容膝以為大
予之為軒也雙楠在前環以茂林來清音於南澗挹爽
氣於西岑方春之陽予楠向榮萌芽葱蒨錯以瓊英入

夏扶踈茫我墻屋翠陰正繁秀色可掬商秋既肅淒兮
向彫凝露丹葉涼風韻條凜凜隆冬雪景尤勝玉幹高
聳瑤枝互映四時代謝此景循環載欣載矚獨寐寤言
樽中芳酒暢予情瀾勸言酌之亦既醺顏荒徑自掃衡
門畫闕乘化委分顧何有乎憂患子自謂此樂無窮而
豪俊之樂不可保彼樂以物而此樂以道嗚呼昔居此
邦胡可勝記同歸乎盡逝若湍水釣臺巖子茶舍陸公
遺址雖在荆棘搖空子有安宅亦曰廣居匪土匪木卷

舒在子子軒足矣將復何慕容聞若驚膽墨而去

韓信背水破敵賦

井陘之役信提孤軍師出間道兮輕騎傳發敵據便地
兮高旗糾紛乘喋血之新勝建背水之奇勲卒破強敵
進兵席卷清四海之妖氛原夫項氏暴興漢師數潰屯
壘蚌鷸形勢腹背將軍以上惟敵所愾指揮迴天地叱
咤摧嵩岱擄魏豹于陣禽夏說于代彼趙人兮擁全軍
之盛據空道之隘登山以望衆寡既非其倫即鹿之圖

得失於是乎在我雖攻戰屢捷威武益張然師實遠鬪
分法之所忌士非素拊兮用或不臧欲以生之必陷諸
死欲以存之必置諸亡于是對大陣之整整背廣澤之
湯湯還途塞兮議不返顧衆志竭兮鋒何可當爾乃棄
鼓以驕敵人之心易幟以惑敵人之視洪濶無際兮軍
馬用殿怒濤有聲兮神若同恚雷磁電掃風起炎至血
陳餘以染諸鏑擄趙歇而併厥地國步寢廣羣心愈親
斷楚之臂亡楚之唇故初軍滎陽不能寸進者數歲及

垓下卒集大統於真人由是知兵法貴竒將謀在智雖
背山阜者彼難於衝突而驅市人則我易以携貳惟變
通不窮故勝可決惟洶湧在後故退無自于時也望而
大笑者多矣聞而未然者有之計非常兮故所不載神
莫測兮敵無以為不然安能以一當百而取之不疑以
勞制逸而用之不疲古有擊虛排術家之多忌易稱左
次違經旨而從宜故得智勇兩全功名兼擅由漢以來
言兵者莫不稱淮陰之善戰

五言古詩

感春

橋門並馳道車轂聲摩空重廊隔囂關聞若林巖中黎
明寮竅集聯騎紛蹄駿交情金蘭契晤語藥石攻翰墨
時間作辭氣爭豪雄微蹤幸接武徒愧勞無功軒牕鑒
晴日簷外鳴春蟲沉迷驚節物飲啄嗟樊籠沂風漸澹
蕩壁水初冲融坐想名園花芳菲街青紅儒宮異拘窘
胡為苦匆匆來時招客醉駕言與君同

夜深偶成

同舍諸稚子初更坦腹眠
湏臾起鼻息洶洶如奔泉
而我憂且病欲卧輒遷延
坐久覺疲倦就枕如臨淵
展轉復長吁情緒更淒然
睡思暫彷彿征鴈鳴九天
使我不能寐體氣寧不便
身心貴攝理事累宜棄捐
而我無所答泣涕但漣漣
是時月當午素影隙中圓

晝卧偶成用前韻

我如邊孝先性愛日晝眠
眠眠曷能寐愁思如湧泉
東

風穆穆和午影遲遲延憂多首自旋猶如瞰面淵人皆
喜春色而我今猶然叱奴啟南牕欹枕望青天浮雲來
飄飄飛鳥去還還望眼無窮極移臥窓之前焉能夢相
相徒自腹便便悠思慕范蠡心形得兩捐輕舟泛五湖
短棹鼓清漣規矩不我制所意成方圓

讀揚子

子雲不偶時晏如在空屋席有玄虛文門無權倖牘法
言譏異戶解嘲懼赤族忿排賦長楊羞愧登天祿立俗

思徇道制行依聖讀身死名不朽馨香藹蘭菊

讀陶淵明集

晉末何所似波心躍長鯨生民畏擾攘感額視撓槍淵
明當此時棄爵務躬耕葛巾漉家耐盃乾壺再傾恢然
聊寄傲無心事將迎眼底不足語筆下漫攄情襟懷有
佳趣落紙字字清有如碎寒冰貯之琉璃瑩又如湛秋
水含茲霜月明秀氣如可掬妙理不可名辭中有餘意
此致尤更精班豪誠可厭曹侈無足評斯文孰比擬誦

之清風生

三月雨霽遊壽聖寺

新霽澤國淨禽聲落雲天精廬巧營構重扉鎖春妍
簷楹曳晴絲池沼鳴細泉卉木互凌沒鉛華刷澄鮮
檜樅屹如削榴櫻開欲然零蕊莓苔鮮幽香雜蘭荃
俛仰欣所遇塵埃坐自捐云何寫軒曠松風鳴素絃

留題壽聖院

休征日欲沉晚風薄虛翠深秋景物清蓮宮有佳致
踈

林速淒涼黃花弄明媚山煙入寥廓螿聲失幽邃翻經
警聞音掃葉不待簪危軒逗寒色飛禽示真意勤役何
足辭妙觀良可秘歸歟誠未央爾耳悲所志

留題覺慈寺

勤役大無怵駕言從勝遊蕭蕭野色淨行行村逕修遶
迤轉隈隩初見巖巒幽喬木聳霄漢風籟凌清秋稅鞅
得精舍雲遶空中樓簷楹列清障下有百丈湫紅塵不
到處俛仰銷百憂喟然問圓頂有此能樂不

留題智者寺

天工剖山腹翻然納虛秀環岡挿修蔭斜巔倚寒溜危
軒列層級橫梁跨深竇浮烟幕輕縷飛禽引鳴脰冲襟
得清眇佳致絕纖垢夢想脫冠來塵緣苦相逗

留題婺州智者寺

宿雨雖乍晴輕雲猶出岫春深卉木繁千巖銜芳秀誰
云山逕幽洎涓響寒溜時禽助好音百轉引鳥脰老僧
邀客留蒲簾捲圭竇側耳石鼎傍蠅聲辯湯候茶品頗

自修擊拂振襟袖勤劬爇鑪香挹試殆三嗅稍定與之
言飄然出塵垢坐久月華生澄潭明列宿

和吳顯道

澤國破秋仲景物非冬索回飈卷林尾宿霧泛寥廓泮
水還闌闌層巒瞰籬落啟牖挹菑葱開徑徒參錯齏鹽
雖寂寥文史欣博約論古到鴻荒談經愧穿鑿逸志想
鴻冥覩顏羞雉啄於焉得真趣豁若解其縛環憲惟載
籍一視等糟粕了了見本來端如契圓覺冲襟遊汗漫

高步趨廣莫同心有名儒攝官在戎幕學識造淵醇詞
章臻炳鑠良驥服鹽車白駒繫場藿念昔始傾蓋考正
于狐貉韻宇凜可欽標致湛無着觴豆陪餘歡翰墨時
間作晨嬉風力勁夜語霜威虐屈指兩炎涼流年信迴
薄九重躋帝德四海絕民瘼南征莫蠻侮西戍弭戎掠
吾道斯為亨君才顧何忤行當坐天祿看書資筆削不
然真成均闡教助飛躍冠綬追英遊林泉謝遠諾胡為
懷故鄉逝將依負郭古都富城市比屋麗金艘甲第臨

江壩勝槩奪雲壑曲溝環淥塍激澗度危約升高或捫
蘿厲急輒遺屩馴禽棲几席幽花墮杯杓漁樵頻問訊
童稚雜謹據尋步陟蘭嶼選勝望菌閣此雖美無度烏
知乖所學待時既韞玉稅駕宜振鐸忠告冀毋忽投分
匪輕託野芹稱美獻行潦資遠酌矐言効悃幅豈止事
嘲諢知君湏多暇過我當如昨茗飲無俗情蔬餐有真
樂論文窮九疇議武貫三畧誰主復誰賓此意良不惡

題諸暨王秀才華軒

卜居遠喧闐山中有清意中為風月軒周詩得標置琴
書道自樂花柳春爭媚紛華非所事安恬養天智君家
逸少後芬芬今不墜文章擅場屋孝弟先閭比小淹何
足嗟懿德天所秘醞藉勿感慨雲雷起平地

次韻葉權之南宮春興

三年客京華零埃侵鬢綠花時豈相關藜藿欣自足故
春鎖膠庠庭槐如兔目沂風清晝吟壁水泛晨矚今我
復來茲芳菲照華屋日長簾幕深欠伸倦晴燠英英同

舍郎文采命騷僕真想寄吟哦詩壇令何肅惟時屆清
明千官賜休沐我事未渠央矧敢念歸宿何當榜貢書
諸生駭神速君歌我乃賡聊以慰局趣

再次前韻贈葉權之

廣文新決科恩袍鬪春綠香名滿衆耳要路策高足阿
房得第五中眉嗟志目平明趨省門容儀聳旁矚廩薄
雖屢空潤身非潤屋竭來鎖南宮迨此東風煥吟哦夜
不休立侍窘童僕詩成字字清華星點秋肅中含不盡

全唐詩卷一百一十一
卷一
意往往念歸沐遙知卧鷓夷獨酌慰齋宿云誰可與飲
隣有三不速篇卷正沉迷當以從事趣

次韻荅翟公巽見戲

鞞中長缺鳴將軍出天山前驅七萃士鐵衣照朱顏萬
馬飲瀚海丸泥封玉關何必學孫吳功成談笑間西顧
淨無塵仰視太白閒歸來佐天子坐使淳風還

贈明智大師

上人真法器根性宿明悟閱書一再過覆誦絕遺誤教

乘浩無涯秋毫析紛互援證窮理窟辭源百川注曉堂
列圓頂瞻仰祛未晤執熱濯清風中瘖飲甘露瑩如壺
中冰潔如機上素鱗角雖出羣豹文方隱霧

送安宣義還雒陽

學省無吏窘官穩如林丘寮窠得之子一語消百憂
鹽對晨餉菘韭餘時羞淡薄本同適言歸異初謀親庭
奉喜慶退有園池幽樂事迺如此攬執安肯留塵區
饒滯念役役無時休冲襟得高躅視身等虛舟嵩少多逸

全宋文卷之三
卷一
士盍往從之遊相見試舉似此語頗勝不

送趙節推泮檄還鄉

蠶月舒以長麥天和更清初荷吐香芽新蒲生紫英濟
濟幕中客眉間黃生明膏車指鄉國言歸奉壽觥上堂
拜嘉慶喜雨淪飛薨斑衣學古戲芳蘭逗春榮世態今
猶昔萬緒水火爭奔馳浪自苦心胸沸庖烹賢哉吾景
崇養志輕利名劾官求便郡晨暮請安平茲行天所佳
祥烟送曉征要當感星聚豈徒資月評

送曾正直

往歲別君去，忽忽殊未饜。來茲諧宿願，一笑忘齏鹽。俛仰復去我，促裝難暫淹。重江逼潮信，掛席程欲兼。諸暨號繁劇，牒訴紛黎黔。君才古循吏，公庭耿秋蟾。借留適民願，坐變六涼炎。政術久彌勵，謠頌喧閭朝。廷方額俊延，訪降宸嚴行矣。決顯用此理，君奚占。

李縣丞美替作此詩餞之

東陽見夫子，格調駭心目。相逢恨不早，請違何太速。咄

吐空中字便便搨間腹暫留腸九回言歸日三卜到家
樂應顛登舟喜堪掬題橋釋舊誓彈冠俟新沐偃蹇何
足嗟君看松與竹

友人有小石數顆以余酷愛將輟惠佳者唯求
一詩賦以贈之

公子有佳石丹碧非一狀磊磊不盈掬巧奪三山狀貯
以白玉斗挹注秋澗瀼有如澄江淨隱映朝霞上類林
官獨冷悅此助清曠唯求詩句易於焉窺雅尚山陰昔

換鵝流傳信非妄

同呂文剛吳邦獻馬子才賦白菊得采字

紅紫春爭妍那復俟秋宰茲花如端人凌飈振輝彩英
英剪輕雲粲粲絡珍珠天清月色留日淡霜華在高標
比松竹芳氣壓蘭茝飄零飢夕餐韡韡富晨采中有神
仙滋收功逸而倍調丹雜樗楮服之母豫怠能駐好容
顏延齡向千載事著抱朴書劉生豈予紹

七言古詩

次韻張察推詠密印竹軒

衛尉才豪雖卓絕，溺志奢淫愧明哲。
羅綺叢中醉復醒，趨拍佳人不成列。
黃門侍郎天機深，傲世忘榮事高潔。
侯印公主不解顏，好竹之心了無節。
紛華必竟致青螺，恬澹有誰賡白雪。
此君佳致識者稀，千古清風與明月。
高僧欲現菩提心，種竹滿軒功未徹。
嬋娟人共得觀臨，蕭瑟師當知演說。
率然相造師勿嗔，勝遊本為吾僧設。
對君不惜洛生吟，更待詩酣歌一闋。

次韻鮮于學錄太一宮海棠

巍巍樓觀神君宅
畫鎖眠魚斷人迹
踞塵不到春自濃
巍巍樓觀神君宅
畫鎖眠魚斷人迹
踞塵不到春自濃
海棠繞砌花如織
日窺絳彩豔朝霞
露浥芳苞點靈液
海棠繞砌花如織
日窺絳彩豔朝霞
露浥芳苞點靈液
枝侵香霧拂桁梧
乘風欲鬪蛺虹綵
都城三月賞花天
枝侵香霧拂桁梧
乘風欲鬪蛺虹綵
都城三月賞花天
爭騁纖驪并赭白
廣文官冷苦無惊
偶到殊庭欣有得
爭騁纖驪并赭白
廣文官冷苦無惊
偶到殊庭欣有得
嬌嬈初值欲開時
迴視羣葩澹無色
許昌風雅譏少陵
嬌嬈初值欲開時
迴視羣葩澹無色
許昌風雅譏少陵
玉壘繞山夸蜀客
豈知移根古壽宮
瑤草華枝伴蕃殖
玉壘繞山夸蜀客
豈知移根古壽宮
瑤草華枝伴蕃殖
雨餘濃麗應更妍
負賞牽吟心未息
雨餘濃麗應更妍
負賞牽吟心未息

赴省試到闕偶成

去年隋隄一丈雪雪路苦寒那可行行人畏寒兼畏滑
滿蹊堅冰如鑑明行裝人與馬成二身不自惜旁人驚
崎嶇千里到京闕痛定回思雙淚傾伊予少小親翰墨
應敵豈解前無勅今者西來皆計吏妄與羣俊爭文鳴
無田歸耕曷為養得失未易秋毫輕作歌聊用寫情素
擁鼻微吟同洛生

蘭溪葉宰以某阻水治山頂僧舍見邀作此詩

以謝

月輪一夜離天畢山川吐雲翳朝日飛廉吼空馳霹靂
雨勢霧霓兩溪溢橫流不復相望鞅浪花飛起三千尺
我時艤舟酣戰慄眼看民居半沉溺邑令之賢誰等匹
為治公居寄家室顧眄奔濤心暇逸寓居恰倚青山脊
吁嗟此驚身未歷折腰遠來甘恐惕餐霞先生今鍛翼
附郭相君無所食愁霖謝子雖非敵少宦徐郎良未憚

和岑運使題趙吏部容膝齋詩

公不見金谷樓臺插寥廓珠璣映出琉璃薄滿甌青螺
甲第空富貴回頭驚旅泊又不見淵明三徑似元卿藍
縷茅簷僅容著心知侈汰非遠謀寄傲南牕安所託二
子薰蕕古至今遺臭傳芬皆自作中郎天機湛秋水涵
泳源流漱芳酌小齋容膝思易安顧盼俗緣嗟自縛琴
書對眼助清閒杖履從人笑踈畧紅塵一點不到處只
許爐香度帷箔吁嗟淡靜世所艱此味要之屬丘壑能
以膏粱甘寂寥道德高風信玄邈真長標置自非凡區

區乃念東山樂見嗤逸少固所宜詎識此生如寄殼會
須掩關友松菊俗子扣門從剝啄揮殘塵尾雖可佳弄
絕韋編良不惡

為陳秀才題墨妙堂

寶池當几潤滑并蟾蜍玉竇寒泉傾墨花泛泛花腳輕
雲牋皎皎月色明凝然嗣將先管城一掃神怪吁難名
騰龍舞鳳相回縈倒日翻星草隸行或如懸崖倚孤撐
又如脫兔馳萬兵猿攀虎怒勢爭鯨奔蜃駭駛波浪驚

篆斯隸邈草伯英鍾蔡衛索更品評逸少兼之集大成
寥寥千載無與京鼠鬚蠶繭秘跡清玉華遺言同誓盟
埋藏不計申與庚模蹤間出相光晶太丘佳士天氣清
訪求寶字金滿籬編聯軸卷紛縱橫名家諸妙皆有聲
文餘高致超八閎深求衆法窺忘情會當臨池滌澄瀛
銀鈎萬字揮崢嶸

送葉朝奉

夫君才調天所旌曾襟洞然秋月明兩以文章對集英

老拳再中匠者驚割鷄已詠劉江陵盤根錯節君所輕
斷蛟刺割無能撓懿效翹然宜彙征列章論薦仁且明
炎涼三歲歌有成千室不放休車行斑衣歸學嬰兒聲
靈椿丹桂芬芷蘅上堂獻壽樂事并餘歡洽比賦丁丁
我之別号不識情君之愛我勤且誠祝君轉飛九萬程
男兒功業貴崢嶸

上毛運使

人各有求心靡同世路奔馳如捕風我獨不願萬戶封

惓惓所願識毛公我公高才真國器醞藉聰明天所秘
子師氣格千里駒廣基文章一枝桂學優入仕斯義榮
我公所至皆可稱來暮已歌廉叔度去思還似謝吳興
天心憂勤念方面外臺遴選皆英彥我公所至綽有聲
炯炯精金經百鍊昨夜使星入斗牛鵲聲曉送傳書郵
報言有詔下天闕公按濱江十四州審報已真驚且喜
入戶不知摧履齒拜塵潘子行有緣倒屣蔡公何敢擬
自嗟此誠今未通何時垂翅附冥鴻眉間黃色已可慶

襟懷不復歎秋蓬公不見張華一賦致高位阮瞻三言得
清議刻畫無鹽雖有心滓穢太清徒自愧朝廷言路方
坦夷比年漢詔下天墀所念淵明方為米會須平子為
玄題

答王及之賢良見寄

公主侯印人所優利鎖名韁吾所羞耿耿有懷非隱憂
思得佳士從之游今年折腰來佐縣辭采接君心自見
懷刺過尋不問程剝啄扣闕諧所願誰云白首交如新

傾蓋相逢如故人，囊中製作絕倫類。
和璧隋珠無足珍，心醉歸來書文室。
却怪前宵夢椽筆，至音寂寞知者稀。
安得論文永足日，可嗟吏道事奔馳。
信信不見元紫芝，宵襟不復憂鄙吝。
圓緘寄我愁霖詩，得詩三復雲牋卷。
喜氣填膺光滿面，一首能輕萬戶侯。
綠髮幸交三語掾，我今爾耳何為哉。
汗漫如君心自灰，為君挹盡雙溪水。
不發纖塵污兩耳。

醉歌行次韻

嘗聞醉鄉之樂真且全
青州從事鄉之賢
孟鑄三百沃軒曠
眼看萬有心陶然平生不識飲
中趣糟漿逆鼻憂頽顛
捧甕徒知詠酒頌側弁
未始陪賓筵丈人襟懷
湛秋水塵埃滌盡中恬淵
美哉家釀歲之久誓可與飲
無留涓宴開設此杯中物
意如割炙何勤度歡誠感激
忘既醉是日飲興輕金船
房攏蠶老舒長晝郊野麥秀
清和天主人故懷客盡量
談間標韻凌雲煙醉歌耳熱
匪吾事兩腋清風同玉川
願言乘茲騰倒景清都謁帝

羅羣仙酒闌逸思不可遏筆端詩句如奔泉

求畫

伯父有畫美且都丹青彷彿顏色渝塵埃漬漬相染汚
惟有筆畫存規模隔步看之有若無想像人物淪煙蕪
剗羊刺鹿皆模糊皮毛狼藉血盤盂巨索懸鼎地為爐
薪火炎炎勝西隅庖人握刀眇精麤几上獸肉縱橫鋪
中有一人與衆殊戴帽被甲腰屬鏤昂藏形貌長髭鬚
眼看手指如典徒一奴秃首携酒壺酌之飲衆蘇勞痛

衆人得酒停烹屠延頸飲之舉兩隅有壇數級如闔闔
壇側毅然一武夫負弓韜矢手執艾左右不敢肆闕闕
此是胡中祭天圖故應先日事庖厨徵生見之嘗覲覲
好之不啻千金姝

全史紀元
卷一

卷一

欽定四庫全書

摛文堂集卷二

宋 慕容彥逢 撰

五言律詩

五排附

贈宗室順國軍節度使開府儀同三司仲公

儀比公槐峻恩分將鉞華楚詩能教子沛易自名家較
藝聯千佛藏書閱五車風猷齊往哲豈謂史臣誇

挽贈開府儀同三司朱公二首

戚畹聯榮久三朝慕遇隆身雖居寵貴志益守謙冲聞

譽揚中外哀榮備始終
新阡標氏族官是漢儀同
襄事涓辰吉華旌拂曉
參車輿尊廣陌宅兆指遙岑
寂泉扃冥冥隧路深
堪傷純孝子揮淚血霑襟

挽祕閣校理知湖州余使君二首

桂籍冠羣英驚人在一鳴
遡風淹鷁路擊水失鵬程
已協三刀夢空嗟五鼓聲
惟應文苑傳不愧史臣評
惟昔都門別于今歲屢更周
旋如昨日慷慨敘平生
短牘方傳鯉長歌未報瓊
仁賢何太嗇此理信誰明

和劉著作偉明貢院即事韻

簪紱千齡會朝廷百度明規摹追古治符瑞協炎精九
叙民歌遂三階夜彩平秉文稱濟濟樂育詠菁菁經術
漸摩久人材長養成禮闈叅衆聽文鑿肅羣情預貢觀
能吏來游盡碩生冒襟窮底蘊頭角競崢嶸藪藪珠璣
墮喧喧虎豹爭氣衝斗斗動詞感鬼神驚收視疑無我
湛思詎有聲袍紛晨霧委憤岸宿雲橫納試庭除晚
歸步武輕身雖同脫鞅心亦類搖旌三級看鱗化千金

想睇迎膏梁搜衛霍行伍擢韓英巧思憐金注塵言沮
海行正迷花錦亂忽覩玉壺清興義窺儒寢純音發帝
莖鉛刀慙利割瓦釜失虛鳴已奏青錢選初聞白雪賡
句從天外得思與海同傾相對一杯酒當前二尺檠詩
壇瞻宿將筆陣却驍兵函劍騰秋紫霜鐘激夜鏗請降
銜許壁引過負廉荆水落崖方露犀燃怪自呈川吟愁
燕雀林嘯慄鼯鼯莫逆諧心賞相從與願并塵風傳勝
語鼎浪閱名烹待報遲星使攄懷賴墨卿何當啓魚鑰

寒食尚留飴

蔣穎叔生日

宗派源流遠家聲竹帛垂靈暉鍾嶽瀆吉夢襲熊羆
擅鄉評美尋膺國士知文章追往哲學識判羣疑試若
穿揚葉科如摘頷髭繡衣趨觀闕霜簡照軒墀諫拂龍
鱗逆身探虎穴危忠猷聳駕鷲直氣懾狐狸要路淹風
鷓丹心比日葵使臺專漕輓帥閭肅邊陸久鬱公台望
初還輦轂時韶筩爭訟息囊橐冠攘衰蓮炬驚宵漏花

輓候曉曦暫分方面寄復演禁林詞廊廟先圖任樞衡
遂倚昆雍容承畫接密勿奉疇咨已冠中樞府猶虛百
斛姿兩轡將畫鹿五總舊名龜儒效流絃吹玉功鏤鼎
彝更增箕翼壽餘慶在庭芝

許冲元生日

良月當初吉昌時叶半千氣鍾奎壁粹壽稟角亢全殖
學優前哲香名自妙年文章魁桂籍風采冠櫻筵要路
諧先據清班聞屢遷芸書讎甲乙黼坐謁溫宣丹陛趨

文石彤庭詠綺錢雲梯滋穩步風翮正孤騫清切陪華
蹕雍容進邇聯夜歸驚寶燭曉直候花甌餘力兼京輔
能聲映簡編冠清桴鼓絕訟息鉅筭捐入謝雖言邁徂
齊遽式遄詞林俄再入政轄遂詳延鯁議違時去丹心
許國堅賜環朝帝所曳履上星躔樞憲仍圖舊巖廊慶
得賢珥璫鸞渚上鳴佩鳳池邊默識通倫類先幾炳眇
綿龍翰迎舜日鼇柱拱堯天夾轂占幡鹿飛冠兆冕蟬
鶴齡偕集木龜算等巢蓮丙魏君臣契韋平父子傳功

卷二
成五福具永作地行仙

七言律詩

恭和元日受寶詩

聖主規模冠百王考茲秦寶欲更張玉因天授來殊域
工與神謀軼舊章羣辟竦觀稱萬壽廣廷昭受襲多祥
宸慈特紀千齡遇詩似奎躔夜吐光

層墀班列華紳萬歲聲中八寶陳映日浮筠盈黼座
如虹佳氣繞楓宸珍符休顯光圖牒惠澤汪洋浹士民

天佑聖神方錫羨從茲諸福與詩新

恭和御製回鑾詩二首

日轉蓬瀛詔蹕歸晚陰風色倍清微從教小雨霑花潤
不放纖塵傍輦飛萬井歡心陪盛觀盈塗嘉頌紀鴻徽
時和歲稔民同樂古昔昇平似此稀

十萬宮花簇馬歸宜秋門道晚陰微雲隨香霧相縈去
塵傍珠躑不敢飛盛事傳為堯壤頌薰風催入舜琴徽
年年池苑春如許天子持盈燕幸稀

恭和御製幸池詩

案池字上
原本缺

乘時遊豫屬皇明
芝蓋重臨太液清
鵷鷺舊臣稱壽筭
魚龍嘉戲出僊瀛
長堤映柳千門啓
翠水涵空一鑑平
天意自同民意樂
無知草木解欣榮

恭和御賜陽德觀碧桃溪新竹詩

三千迸籜拂朝雲
想見坤祇夜駿奔
嶰谷掄材聞古帝
桃溪呈瑞屬神孫
如犀亟應絲綸命
帶粉初縈雨露痕
欲測九重宸莫永
會須億萬數靈根

恭和御製朶樓特宴之什

東闕岩窈宴特頌樓前寶燭萬星寒鼓聲泛樂鼉靈震
鑪篆回風翠鳳盤積有嘉祥占歲稔寵因芳久慶時安
厭厭既醉君恩重歸路繁華緩轡看

次韻祝通直甘露詩二首

聖心天意兩無違露灑文昌若應機

北齊邢子才甘露詩云誰謂穹昊遠

道合若
應機

甘自蜜房分瑞液瑩疑蟾窟借圓輝遍裝叢柳

春爭麗高應晴空午不晞豈止臣民胥鼓舞故應殊裔

亦心歸

露液無聲降自天
清英含味滿丘園
日中垂溜真珠落
風後寒澌雜珮翻
呈瑞未央曾紀歲
襲芬儀鳳亦更元
廣寒應德彰嘉祉
臣子相看眉宇軒

恭和御製以節近嘉平時雪驟應詩

翳翳同雲結晚陰
六花宵降聳瑤林
一犁共慶農疇足
四海安知帝力深
陽位涓成初奠玉
真祠昭謝正齋心
况當節紀嘉平近
時雪時暘自溥臨

恭和御製元會之次日嘉雪應候錫宴于公相
之第詩

三元盛禮冠年華翼日朝隄雪覆沙端為聖時調玉燭
故當餘臘雨天花萬箱占瑞民胥慶青輅迎春節尚遐
錫宴賜詩知有喜自應和氣浹潛芽

恭和御製以嘉雪愆候躬致懇禱精意上孚靈
貺昭格已卯庚辰降雪盈尺賜相臣詩

皇心閔雪正傾祈盈尺呈祥靡願違潤浹土膏占歲稔

和生民氣敵鑪輝千門瓊瓦連雲聳九陌瑤花撲面飛
聖德格天超曠古更須宸翰述沉幾

嘉平紀月近正端時雪時暘軫念寬雲色乍收銀闕角
月華徐轉綵旂竿映階積素光相射迎吹餘花舞向闌
最是三農知歲樂歡欣無復歎祁寒

恭和御製喜雪

需宴宸章次第頌祥靈宜入詠歌間心知旦暮千齡遇
目覩聲詩六義還洽格雨暘皆順序慶均朝野共怡顏

微臣叨預承恩列賡和才菲若負山

恭和御製觀儺詩

日近新正臘已殘
鼙鼓響晴寒
神資颯爽來羣祀
舞節踴躍應七盤
門礫交修邦典備
物疵銷盡里民安
欲知聖主憂勤意
深拜宸章仔細看

次韻和吳右丞恭覽神宗皇帝御集詩

永裕規撫映萬春
孝思今見聖心循
仁言盡集絲綸舊
細札初刊琬琰新
盛比鈞天張九奏
麗如華袞繪三辰

通僚拜賜榮懷甚亦輟餘編寵諫臣

次韻伯父元夕有感

往歲元宵寓帝京天光黯淡雪奔騰揚鑣公子羅千騎
隨計書生對一燈舊事悠悠頻入夢新愁鬱鬱更填膺
低頭懶看南軒月撥盡爐灰對好朋

試燈日侍親遊戒珠寺

雪花新霽玉雲閒慶侍來遊古戢山稅駕且需明月上
捧觴徐戲綵衣還樓臺燈火青冥外市井笙歌縹緲間

膝下歡娛誰與共
棣華相對醉酡顏

和中書梁侍郎君臣慶會閣賜御筵詩

巍巍層閣倚雲開
閣上書從帝所來
率土士民瞻慶會
華筵樽俎幸參陪
宸文正比天文麗
春力應隨筆力回
主聖臣賢千載遇
欲形歌頌愧非才

和中書梁侍郎喜雪賜御筵詩

康莊雪景曜重闕
宴錫潭潭府第間
愛日似隨人意出
祥風時泛樂聲還
歡謠已見喧民俗
喜氣遙知動帝顏

溫詔許持金竿醉戴恩同祝壽如山

和蔣秀才牡丹次韻

如霞如錦色何鮮映日散風特地妍
獨占一春疑得勢
平欺羣卉若當權
自知麗豔能傾國
須放香苞趁禁煙
花市試詢桃李價
從今不直半分錢

次韻阮承書詠桃花菊六月開

怪來籬下欲成蹊
菊似桃花賞客迷
清郁雖同彭澤逕
嬌紅全是武陵溪
露沾宿藥金絲潤
日炙繁英玉葉低

占斷春光與秋色薰風特地與留題

和余秀才遊綠淨堂以詩見寄

佳名誰為勝嶠岑牽惹詩翁躡屐尋
綠外清風先見竹
靜中新轉不妨禽沈酣山水真君事
汨沒文書豈我心
待撥頻頻聊一賞振衣閒坐洛生吟

次韻題任承事清樂齋

塵襟滌盡更無餘兩字名齋信起予
物外清標輕紱冕
閒中樂事付琴書蘭生階砌青春好
槐覆門庭過客疎

更有孤吟寫幽思篇成渾似琢璠璣

咏蔣秀才西軒詩

園池佳處闢幽軒西揖湖光入坐筵藥本自生芳草地
花陰長到夕陽天就閒頗似陶潛逕適意何須范蠡船
此覽清虛有真趣不勞他境覓林泉

和元卿

水根山脚最荒涼子隱顏祠足感傷廊廡傾顛春草綠
門庭寂靜野花香聞之自可成酸鼻見此如何不斷腸

追想舊蹤徒悵望淡煙淺露忽斜陽

荆吳豪俊最繽紛功烈平西自出羣節操不慙張御史
功名終似李將軍安仁句語聊書實宣佩聲猷更襲芬
宣謂千年有遺恨數間頽屋枕溪垠

知縣沈奉議所至榜雙清于書室諸公篇詠甚
多猥以見屬輒賦四韻

燕居隨處榜雙清借問何修稱此名迹似壺中冰瑩潔
心如潭底月澄明棠陰人散紅塵靜爐篆香飄翠霧輕

不必林泉堪寄傲
林泉雖勝尚闕情

和四十伯父見寄

入夏情懷轉不中
多愁多病愈乖慵
匡詩該博終難繼
蔣選幽閒頗願從
賴得古文消日月
更無佳友話心曾

時數交友
皆外造

吾宗幸有邊經笥
却得時時一叩鐘

比來維日捧詩筒
久廢吟哦覺懶慵
韻險不容更屬和
意勤須索強隨從
深思往往花盈睫
得句常常汗決曾
萬事始知闕習否
賡酬本合類撞鐘

答王賢良見寄仍次元韻

一觀清表喜良儔
三惠佳章歎暗投
已駭談鋒傾海瀆
復驚文怪埒蛇牛
敢將晚路輕王述
決有亨途待薛收
君欲獻書真得計
我今亦作董生謀

遊天章寺陪越帥邵司業京東漕呂侍講通判
錢承議行

路轉湖天宿霧開
碧霞深處涌樓臺
山川到午晴暉秀
林木先春綠意迴
舞鳳寶書藏琬琰
換鵝塵跡鎖莓苔

全宋詩卷二
賤遊不畏風霜動擬看雲尖送月來

和彥昇聞更聲

蝶夢回來側耳聽夜深風細轉分明嗟予觸物徒勞感
顧爾于人豈有情宰寺樓高聲更遠楚天霜冷韻何清
因茲却憶南軒宿兄弟之言悉至誠

五言絕句

題白沙驛壁

未忍歌歸去行當獻子虛自嗟渥注種垂耳服鹽車

題婺州道傍水閣

勞生成底事寸祿解縈人陽羨溪山好歸歟未有因
留題婺州孝順鎮寺

處靜未有計徒勞真可傷山僧應笑我只為斗升忙
甲申十一月夢中詠假山

欲雨煙雲凝經秋苔蘚多憑君莫拋擲留取伴吟哦
七言絕句

和王推官正月十三日遊戒珠寺竹軒詩

誰種篔簹翠掃天擬將風月度流年當軒便是真如境
到岸何須般若船

積雪滿山寒不釋碧琅玕遶玉樓臺林稍清韻風吹到
簷底踈陰月送來

貢院即事

自崇寧癸未叨備從班距今十有四年間五
知貢舉文官花在試廳前

文官花畔揖羣英紫案香焚曉霧橫十四年間五知舉

粉牌時拂舊題名

醴泉觀宿齋詩

并序

宗寧三年正月十四日以中書舍人扈蹕至
醴泉觀屬有公事免赴對御試草于道院之
竹軒政和四年二月十三日被旨奏告顧視
齋館即曩者續綸之地也屈指十有一年感
而成詠

昔陪清蹕歎靈真曾對疎篁續帝綸十載重來渾似舊

香奩集卷二
惟應雙鬢二毛新

月夜偶成示翟公巽

一杯誰與細論文對影成三更此君却憶當年少陵客
空吟春木與江雲

非闕色相與聲聞此意如何舉似君真馬不須鞭影露
本來誰道有迷雲

和兵部何侍郎宜香閨五絕

香如雲彩出無心一室初凝畫舫深靜對氤氳永終日

誰知真相在清襟

夕薰猶泛絳紗中
曉炷重添翠遶空
欲識芬芳何所似
百花叢裏度香風

暗窻日色鑿重幃
香霧橫襟進講歸
西學尚賢恩禮重
惟將經術贊沈幾

鄉賦蒙收一日長
文闡恩地自宗房

侍郎兩為常州
考官初勝伯父預

選及再至彥
逢幸出門下
搢衣獲造芝蘭室
猶認當年月桂香

不問無言與有言
香山何事解聞禪

來詩有香山寂
寂聽因緣之句
須

知篆繡搖空處便是重重說萬緣

次韻上酬郭慎求長官

金盆馳問請閣人郵信浮沈杳未聞二十八言還寄我
一揮多謝管城君

次韻上酬四十伯父

南郭先生物外人鏘金佳製喜重聞寫成圖軸閒來展
要似徽之愛此君

寄單季隱

別時新柳拂煙汀已見黃花照眼明
却憶荆溪寒雨夜
笑聽屐齒出相迎

題婺州多福寺壁

我僕雖勞日未央秋風行色稻花香
歸心那解同元亮
官况由來似偉長

和衡姪題孫德明墨梅

霜風栗烈砭人肌又是江南梅發時
寫影尋真未端的
此心隱處是南枝

欽定四庫全書

摛文堂集卷三

宋 慕容彥逢 撰

詔

賜仁福帝姬辭免冊禮許允詔

朕膺祐上靈占祥右悅爰當初睟肇賜美名申父子之
至恩既揚孚號篤邦家之多慶敢替舊章茲上奏對亟
辭冊禮載詳謙挹良用歎嘉特徇虔祈永綏遐福

賜少保太宰兼門下侍郎鄭居中辭免男億年

直秘閣允詔

朕搜揚俊乂靡間疏逖惟卿以道德勲業翼贊大政而其子力學篤行達於朕聽不有褒嘉何以示勸是用寵以芸閣之華卿抗疏懇免朕親御翰墨既却其請矣今復有陳迺以待試學校為言朕嘉卿徇公忘私遵奉法令足以率勵在服特從其志茲永有辭

賜少保太宰鄭居中辭免冊命允所乞詔

卿時之先覺以道德謀謨佐佑大政茲延登於保輔寅

亮天地師長百寮任重禮隆肆命宜允

賜新除太傅致仕何執中辭免冊禮允詔

卿位宰輔引年得謝以三公就第列宮師備文物而發命焉所以優禮元老為在廷之勸也今卿抗疏懇避辭肫意切朕勉從之以成爾撝謙之美

戒勵百官遵奉法度詔

朕承先帝休德永惟熙寧元豐之盛以紀綱則肅以政事則修以典章則備官師共恪民物阜安蠻夷率俾雖

二帝三王之治未有以進此也朕嗣守基緒監於成憲
冀緝熙潤色之以垂無疆之休故首命輔臣慎簡乃僚
講論庶績凡先帝之所議而未行或已行而廢於元祐
者朕於此繼其志述其事唯恐其弗逮故惇睦宗族以
隆親親恢崇學校以一道德董正官儀以辨職守刊憲
令以明禁戒欲下不加賦而國用足則理財以義欲邊
不告警而疆土闢則禦戎以威小大精粗本末具舉其
效彰明較著者蓋不可以一二數也廼者太史獻言五

星循軌考之故實時惟休應朕用嘉之樂與卿大夫守
此法度優游無為承天之休以享太平繼又肅儀衛考
星辰正衣服下至百工技藝罔不興飭將討論治定之
禮功成之樂以明繼述之效若此凡百官君子其同協
心遵奉法度堅如金石信如四時以副朕至誠惻怛之
意其或志在傾巧而以浮言動搖習於怠惰而使文
僥倖朕得治而懲之咨爾在位明聽朕言朕將垂拱仰
成於茲爾亦有辭於永世

賜延康殿學士強淵明辭免恩命不允詔

卿操履端靖問學醇明再直禁林進承密命文詞議論
朕所褒嘉茲抗封章累以疾請察其誠確俾即所安祕
殿高華祠宮優秩併為汝寵昭示異恩宜止謙詞亟祇
成命

賜新除顯謨直學士依前永興軍路安撫使賈
炎辭免恩命不允詔

朕以卿才資疏通風力強濟往膺閫寄方埒壯猷爰進

直以寵行俾增華於所涖勉圖報稱勿事謙辭

賜新除翰林學士承旨馮熙載辭免恩命不允

詔

禁林詞臣以重德夙望獨承密命蓋極儒學之選卿經術醇深文辭典麗明於大體議論有餘俾踐厥官時乃親擢抗章引避未體眷懷成命已行宜祇受之

賜翰林學士馮熙載辭免恩命不允詔

北門視草朕所慎選以卿經術深美文詞典雅踐揚清

要綽有華問乃茲親擢俾踐殿次抗章祈免未體眷懷
朕命惟行宜即祇受

賜少保太宰兼門下侍郎鄭居中辭免外甥朝
奉郎知大宗正承事李伯達除尚書度支員外
郎恩命不允詔

文昌諸郎必資材望以伯達揚歷有譽俾踐殿次而卿
抗章引嫌祈寢成命秉公守正朕惟汝嘉惟官擇人時
乃親擢於義無嫌勿復有陳

賜太傅何執中辭免恩命不允詔

卿以甘盤舊學輔相朕躬勲德兼隆為時元老今茲得謝惟優恩異禮乃稱始終待遇之厚廩餼之入顧何足辭宜體朕懷勿復祈免

賜新除翰林學士承旨鄧洵仁辭免恩命不允詔

詔鄧洵仁省所奏辭免恩命事具悉禁林承旨儒者至榮久缺不除蓋重其選卿志操端靖學問深醇議論文

章夙有華問典司內制朕所眷知茲用褒嘉俾奏密命
趣宜祇服毋復有陳

賜新除翰林學士許光凝辭免恩命不允詔

視草北門極儒人之選人惟求舊申命用休以卿學識
高明文詞典雅曩踐厥次休有譽言召自遠邦再入祕
近宜體朕眷往楸承之

賜大司成陸蘊辭免恩命不允詔

大司成摠學校之政令非望顯於時多士信服者不以

輕授卿術業行誼朕所嘉尚是用輟自詞掖俾踐厥官
宜體朕懷往祇成命

賜新除翰林學士劉嗣明不許辭免詔

北門學士潤色論思為職考擇之慎必惟其人卿學有
淵源辭知體要揚歷華顯業履兼隆乃茲新除俾踐厥
次胡為謙避宜即欽承

賜新除工部侍郎方會不允辭免詔

六官之貳資望高華卿學識淹該履行醇茂揚歷有譽

宜踐厥官胡為撓謙尚勤訓告朕命惟允其往欽承

勅

賜龍州知州彭允宗等進奉賀端午節溪布勅

書

汝遠有邦土久衛邊陲聿當時序之臨來效物宜之貢
載詳勤恪深用歎嘉

賜保大軍官吏等示諭勅書

朕以某人稟資沈勇護塞忠勤進築新城大殲羣寇旌

其師律鋤以將旄緬懷吏民爰及師旅茲聞渙號諒愜輿情

賜修武郎趙子噩獎諭勅書

朕恢建黌宇聚衆姓而教之惟汝三子年尚幼也而能通誦羣書與夫八行八刑之文小子有造在於屬籍義方蓋有自矣朕用汝嘉

朝請大夫行大理寺丞馮大鈞可大理正勅

勅具官某書曰非佞折獄惟良折獄故朕於刑法之臣

選任尤慎爾丞於廷尉克有譽處宜能體朕欽恤之意
惟詳正之官實佐卿貳今以命爾尚其懋哉可

賜護國軍官吏人道士僧尼百姓等示諭勅書

勅某人等朕以某人氣節忠純材猷闕廓比膺詔旨往
撫邊陲克有顯庸宜加寵命俾聯班於上宰兼視秩於
貳公爰易將旄仍陪封戶逖聞孚號諒愜羣情

賜知安州向萬嚮等進奉賀天寧節并端午冬

正溪布勅書

爾祇服朝恩介居邊裔爰因嘉節克謹彝儀載省勤誠
不忘嘉歎

賜保靜州知州彭儒武等進奉天寧節并冬祀
冬正溪布勅書

爾世服朝恩嗣修貢職爰因令序克講彝儀載念恪勤
良深嘉尚

賜保靜州知州彭儒武等進奉賀端午節溪布
勅書

汝邈在裔居克綏世守當端辰之紀節修遠貢以効勤
載念忠誠益增嘉歎

誠諭三省樞密院修舉先朝政事

勅父作子述繼明以照四方君令臣共相待而成一體
朕承右序之重思保艾之艱若涉巨川罔知攸濟若構
大厦適求厥成深念熙寧元豐之間高越貞觀開元之
上以謂先皇帝聰明睿智齊聖廣淵旋乾轉坤奮無前
之偉績深根固蒂建不拔之宏基十有九年一新百度

都俞吁咈謀謨至詳緝熙儀刑典則俱備恩洽動植威
暢蠻夷大聲如雷霆可聞而不可象其震為章如雲漢
可仰而不可繪其光肆朕繼統監茲垂裕爰詔列位悉
復舊章惟徒法不行必得人而後舉而美意所寓蓋流
澤於無窮尚懼科條雖設而考覈或遺敷繹徒勤而發
揮靡究不足以揚不刊之典垂無疆之休恭默以思休
惕若厲咨爾執政時予仰成逮事先朝與聞彝訓循名
考實揆往驗今孰戾而弗修孰委而未舉於焉匪迪罔

或愆忘一物失宜曰予之咎庶邦作乂惟爾之賢其慎
乃猷各倡厥屬率時昭考予將比跡於周成格於皇天
爾無專美於商尹故茲誠諭其往率循

批荅

賜皇后賀冬祀禮畢批荅

勅皇后鄭氏朕夙駕齋輅親祠泰壇格茲熙事之成實
亦柔儀之助方還詔蹕遽閱慶函載味勤誠良深嘉歎
賜內中夫人郡君已下賀冬祀禮畢批荅

勅某人等朕聿修元祀祇見上穹熙事迄成休祥類至
載詳慶牘良悉柔誠

賜皇弟燕王越王賀冬祀禮畢批荅

勅朕聿修天報爰舉明禋熙事迄成景貺昭格有嘉同
氣實相盛儀及茲詔蹕之還首閱慶函之奏勤誠斯至
歎尚良深

賜大長帝姬賀冬祀禮畢批荅

朕涓選靈辰稱秩元祀祇膺純佑獲底熙成茲閱慶章

備形善頌虔誠斯至嘉歎良深

賜新除宰臣鄭居中辭免恩命批答仍斷來章
朕承列聖之垂裕膺上帝之降康適求厥寧考重其相
蓋賴股肱之助克濟宵旰之勤以卿道術純明器業闕
廓行高而志潔論正而謀嘉以文武之兼資有忠孝之
大節踐揚政路於茲十年贊翼治功允惟一德用延登
於宰席既敷告於朝倫胡為撓謙尚形遜避

賜新除宰臣劉正夫辭免恩命批答仍斷來章

朕祇循考翼聿承天休永思萬化之原必資一德之輔
詢謀至重授受豈輕以卿學識高明器能宏博慮經遠
而不競言底成而可稽自擢近司於茲八載其忠亮足
以式百辟其通敏足以贊大猷肆膺注意之公用錫揚
廷之寵朕命不易爾勿固辭

賜新除知樞密院事鄧洵武辭免不允批答

朕惟本兵之府天下武政總焉嘉與不二心之臣圖回
萬務以靖四方卿學術宏深器識高遠端亮之節著於

朝倫忠讜之言簡於朕志迺以舊弼擢長樞廷宜體朕懷往祇厥服何為謙挹尚勤訓詞

賜宰臣鄭居中辭免冊命不允批荅仍斷采章卿以忠恪端亮簡在朕心擢位宰衡進秩亞保已戒有司涓日陳儀班百辟於廷而冊命之位重任隆禮惟其稱豈特褒嘉輔臣將以為卿士大夫之勸也往祇寵命無或重陳

賜新除知樞密院事鄧洵武辭免不允批荅仍

斷米章

朕以卿帷幄舊臣謀謨之嘉素履之美矐察盖有素矣
擢長樞筦方佇進為搆章繼陳殊拂朕志毋煩訓告往
懋承之

制

除檢校少保充護國軍節度使開府儀同三司
依前中太一宮使加食邑食實封差遣如故某

制

朕經武以綏萬邦信賞以勵羣辟有懷寧考不忘疆場
之虞肆命信臣爰整干戈之衛總護諸將屢奏膚公誕
揚猷告之言寵錫勞還之禮具官某直方莊重敦厚裕
和器任大而有容謀經遠而克繼秉忠自奮內宣心膂
之勤仗義不回外著爪牙之助頃膺中詔往撫西陲事
靡辭難言皆底績出入鞞鈐之略縱橫帷幄之籌日百
里以開疆新城列峙月三捷而獻馘狂敵殄殲招來逋
逃懲革奸矯黜羌請命遠夷鄉風茲聆奏凱之音特舉

疇庸之典視秩上宰聯袂繡之盛儀易節雄藩峻旌麾
之寵寄名進貳公之貴封陪多戶之優凡厥恩章時惟
褒律蔽自朕志協於師虞於戲吉甫以伐玁狁之功來
歸自鎬召公以平淮夷之美告成於王迺眷壯猶無愧
前哲往綏祉福豈俟訓言可

武康軍節度使除開府儀同三司某制

朕率時昭考建社稷無窮之基若昔大猷謹疆場不虞
之戒修嚴武備贊協治功選於臣鄰既得詩書之帥授

以麾節俾宣道德之威遠閱歲時宜疇功次肆優品秩
進視公台丕告治朝顯揚休命具官某器博足以任重
才高足以濟繁憂勤百為有忠精享上之實險夷一節
無循默養交之心夙被甄陞亟踐華要令聞令望民言
維休嘉謀嘉猷國是允賴曩付六纛往臨三軍并鉞參
旗增壯爪牙之衛龍韜豹畧獨專帷幄之籌念爾宣勞
加予注想未申褒典殊鬱眷懷是用按厥舊章錫茲寵
號惟開府建自魏制而儀同本於漢名階序尊崇禮文

貴重簡在朕志僉謂汝諧於戲名罷不以假人爵祿所以厲世惟茲異數匪曰私恩視爾師寧爾邦期克邁於彝訓修乃職考乃澹佇益奏於膚功

除保大軍節度使充熙河蘭湟路經畧安撫使
兼知熙州某制

周官以八柄詔王莫先馭貴左氏以七德經武亦曰定功迺矐爪牙之臣克勤疆場之衛涓辰錫命孚號揚庭具官某罷字沈雄性資嚴翼竒謀必中擅玉帳之威名

義勇無前稟金行之勁氣久共武服積有戰功茲統銳
兵往築新壘悉乃心力濟予事機誅斬寇讎曾隻輪之
無返肅清邊徼方百堵之皆興用答殊庸特頒優賞洛
郊顯鎮俾進秉於將旄狄道雄藩兼寵專於帥閫益隆
寄任并示褒嘉於戲往城於方出車所以美南仲用錫
爾祉江漢所以命召公無替前修尚觀遠業可

皇叔府州管內觀察使仲憫可特授昭化軍節
度觀察留後皇叔閬州管內觀察使仲搏可特

授建武軍節度觀察留後制

勅朕永懷孝思念茲祖考推原所自褒顯近親豈惟示
敦睦之恩亦以彰忠厚之化具官某爾等列於屬籍夙
奉內朝恪謹有常祇循憲度宜錫命書之寵進陞留務
之崇尚體眷勤克綏祉福可

除少保某太宰制

朕承列聖之休緒臨九有之嘉師適求厥寧考慎其相
若構大厦必資柱石之強若濟大川必假舟航之利乃

眷良弼夙著顯庸宜申注意之公用錫揚廷之寵具位
某道深造而自得氣直養而至剛材周萬務之微真古
賢佐學洞六經之蘊為時儒宗恢恢文武之資顯顯忠
孝之業回翔政路於茲十年翼贊治功允惟一德慮經
遠而不競謀底成而可稽師言克諧國是永賴宜自斗
樞之貴延登鼎鉉之崇兼總東臺并華亞保加以爰田
之賦陪之真戶之輸併錫寵章式昭異數於戲舉臯陶
而選於衆朕不昧於知人迪高后而暨乃僚爾無忘於

服朕言毋易素守可

朱諤除尚書右丞制

勅朕仰承天休中外康乂嘉與黎獻守茲太平肆求一
德之臣俾與萬幾之政具官某氣節剛毅才猷靖深道
學貫於淵微明識開於倫類夙以文采擢置甲科險夷
備更趣尚堅正曩司風憲進長儀曹忠謹屢聞國是允
賴宜膺柄任修輔朕躬於戲網轄之地庶工所瞻其尚
體朕用汝之意使命令之出於中臺者罔有不臧職業

之隸於六官者罔有不肅是為克稱尚欽念哉可

尚書右丞鄧洵武可尚書左丞制

勅朕敷求一德之臣與之共治惟中外萬務總於文昌而左右二丞實司筦轄更踐厥次必惟其人具官某識度高明謀謨忠亮夙以儒學揚歷要塗業履之優簡在朕志曩自憲部擢與機衡居多建明國是允賴宜膺寵命進服左綱於戲惟虛厥心乃能振舉樞憲惟正厥己乃能糾率官聯往服朕言勿替素守可

梁子美除尚書左丞制

勅朕宵旰圖治以承天休迺瞻樞憲之臣均任股肱之
寄簡知滋久褒陟為宜具官某材猷閎深器識淳大夙
由學行之懿寢膺問譽之華踐揚居多險夷備歷靖共
不撓公論所嘉比自民曹擢與大政業履休顯益契朕
心宜服寵章序陞左轄於戲惟公惟正乃能振舉機要
惟和惟一乃能協贊廟謨往服朕言尚加厲勉可

吏部侍郎杜常可工部尚書制

勅朕總覈名實凡小大之臣必惟詳擇庶幾協於克一
守茲太平矧中臺六卿品秩高顯選用之體得人惟艱
具官某操履謀濟以問學持橐侍從望實兼隆疇若
予工宜以命汝惟程衆藝飭五材咸總於汝尚其勉哉可

承議郎試刑部尚書侯蒙可朝奉郎試刑部

尚書制

勅考績之政掌於有司雖吾八座之臣亦率是法具官
某踐揚要路業履清優輟自中司分長憲部會課米上

宜以序遷錫茲命書往其欽佩可

御史中丞侯蒙可刑部尚書制

勅中臺六卿時謂八座秩品隆峻選授攸艱具官某曩以材猷寢膺推擇擢自瑣闥任予中司整飭憲綱克有譽處秋官之長往惟汝諧其既乃心以倡厥屬惟刑之恤庶紹前休可

尚書左丞何執中可中書侍郎制

勅朕宵衣旰食厲精萬幾惟二三執政大臣均任股肱

之寄而發號施令根本於中書必惟忠良乃克有濟具
官某器識端亮謀猷廓深早膺搜揚進講潛邸經術行
誼朕所簡知曩繇銓曹擢總綱轄守正不撓為時老成
是用延登西臺進聯右弼蔽自朕志協於師言於戲立
政用人惟爾宣奉其尚益尊所聞迪朕以先王之典夙
夜靡懈期底成功罔專美於前人茲有辭於永世可

鄧洵武除中書侍郎制

勅朕考擇臣鄰與圖邦治惟右省號令所自實司化原

用人於茲夫豈輕授具官某直方不撓寬裕有容學總
六藝之文識通萬微之要揚歷華貫致位近司謀猷惟
嘉翼贊國是比以序進延寘左綱忠恪之誠益契朕志
宜膺寵命陞貳西臺於戲立政惟其當故德澤下流用
人惟其能故職業交舉往攄遠業勿替朕言可

何執中除門下侍郎制

朕詳延儒臣與之共政惟東臺出納命令緝熙皇極登
建厥貳蓋難其人具官某純誠不欺莊重有守識該通

於倫類學兼綜於古今侍朕初潛舊膺瞻察擢寘近弼
師言允諧比服寵章進直西掖任屬加峻忠恪益彰宜
以序陞位於黃闈於戲惟守正可以斷國論惟同寅可
以亮天工往服訓詞圖休於永可

左光祿大夫守門下侍郎吳居厚可資政殿學
士充太一宮使制

勅朕體貌大臣恩紀維厚任均佚勤之異禮全進退之
宜具官某早服寵榮寢踐華貫再尹京甸兩冠民曹曩

擢近司初持右轄游由西掖進直東臺參贊政機屢更
歲籥茲援引年之義數形避位之言封奏繼來悃誠莫
奪宜從爾請昭示朕恩用加祕殿之名仍領真祠之秩
是為優遇無怠欽承可

御史中丞席旦可吏部侍郎制

勅六官之貳皆予侍臣而吏部職任銓綜至於封爵策
勲與夫會課殿最之法悉以咨之具官某曩直詞垣進
陞瑣闥繼自盾省擢摠憲臺文昌貳卿今以命汝惟朝

廷所以馭羣吏者其法既具往祇厥服尚其懋哉可

光祿卿除戶部侍郎制

朕以義理財庶幾家給人足國用饒羨如熙寧元豐之
時間者修水土之政行鹽茗之法廣山澤之利復抵貸
之令凡所以緝熙先猷者罔不備舉雖內則羣有司外
則四方郡縣推行之至於逆其治聽其會以稽其勤惰
登耗之寔則其責蓋在於民部故二卿之選今難其人
具官某才識敏明操守純正踐揚中外練達事為比膺

選掄長於勲寺凡邦國酒醴膳羞之事以修其儲備謹
其出納節其等差量其豐約為職今予命汝以貳民部
任雖不同舉斯以加諸彼擴而充之其則蓋不遠也往
哉惟欽勿替朕命

通直郎顯謨閣待制席旦可戶部侍郎管勾右

曹制

勅朕總覈名寔為官擇人凡內外小大之臣罔不考勾
矧中臺貳卿秩望華顯俾踐厥次必惟端良具官某學

術純明操履堅正詞垣盾省憲府銓曹揚歷滋多休有
譽處曩罹憂制既逮祥琴宜還近班往副民部體茲眷
寵無替欽承可

朝請郎試光祿卿韓持可戶部侍郎管勾右曹

制

勅朕總覈名實為官擇人凡內外小大之臣罔不考勾
矧中臺貳卿秩望華顯俾踐厥次必惟端良具官某性
資疏通心術宏贍揚歷事任見謂詳明頃膺選掄擢長

勲寺率職有裕朕所眷知宜服命書往副民部邦國材
用汝實總之圖稱所蒙無替忠恪可

廣西經略使王祖道除龍圖閣直學士制

勅朕操爵祿之柄以褒勵庶工察其勞能雖微必錄矧
服在帥閫而以四方之功達於朕聽宜優慶賞昭示寵
嘉具官某䟽通有謀莊重不撓奉行詔旨開闢土疆三
至平州靡憚衝冒舊城既築新境來歸績效若茲良副
眷倚用錫明命進直西清尚懋厥成嗣膺召擢可

樞密直學士知成都府虞策降充龍圖閣直學

士制

勅朕惟神考稽古驗今制免役之法以子惠天下紹聖
纂承推原美意緝熙訓典垂休無窮朕嘉與公卿大夫
守茲成憲其嘗紛更沮壞於其間者必治而懲之具官
某項任民曹職當遵奉迺懷私意妄改詔條彈章以聞
考寔具在肆加貶黜用做官師往省前愆毋重後悔可

侍御史余深可除御史中丞制

勅中司之任肅正朝端明法直繩國是允賴具官某氣
莊以毅學博而醇曩雁選掄揚歷憲屬望實之峻朕不
弭忘比自螭坳延寘橫榻風節勁特知無不言忠蓋若
茲良副朕志宜加褒顯擢總臺綱往服命書豈俟多訓
可

朝奉大夫充顯謨閣待制知瀛州張近可朝散
大夫依前充顯謨閣待制差遣如故制

勅叙進羣吏邦有典常雖吾從臣亦率是法具官某擢

在帥閫克以材稱會課當遷有司條上宜陞品秩以示
寵嘉往服朕恩無忘厲勉可

衛尉少卿韓持可光祿卿制

勅具官某光祿置卿班序視七寺為高故常擇望實久
次者居之惟爾累更事任往踐為宜凡邦國酒醴膳羞
之政隨其等差務協於度時乃稱職尚欽念哉可

朝請大夫光祿卿李闓可顯謨閣待制提舉宮

觀制

勅朕寵遇羣臣務全禮意均勞之典時乃異恩具官某
服采於朝實長勲寺朕思處之不失其宜又念其頃帥
師湖外討蕩蠻獠克復疆土且神考選拔之臣是用假以
宮祠聯職華閣從任優秩尚慎厥思可

起居郎席震可衛尉少卿制

勅具官某衛尉掌邦國器械文物之政令凡武庫之備
與夫祭祀朝會羽儀節鉞之屬總焉汝比擢記史日侍
螭坳司衛副卿今以命汝往踐厥次尚其懋哉可